

REGIONAL NEWS BULLETIN
HEADLINES (EVENING)

Date – 15/04/2025

Time - 18:30 Hrs

1. Chief Minister Pu Lalduhoman Mizo folk art te tha taka phochhuah chu Mizoram leh hnam chawimawina a ni a ti.
2. Chief Secretary charge la mek tu Pu H. Lalengmawia'n Centrally Sponsored Scheme hnuaia thawk te chu dik leh mumal taka lak an awm loh avangin dah ngheh theih an nilo a ti.
3. All Mizoram Village Council Association 2025-2030 hruaitu thlannaah Elected OB post ah ZPM Party atanga Village Council member-te thlantlin vek an ni.
4. India Meteorological Department (IMD) chuan kumin furah ruahtui a tam dawn tih a sawi.

<><><>

CM

Chief Minister Pu Lalduhoman Mizo folk art te tha taka phochhuah a ni chu Mizoram leh hnam chawimawina a ni a ti.

Vawiina Lianchhiari Run Mini Theatre, Aizawl-a UNESCO World Art Day, 2025 leh lemziak phochhuah a hawannaah he thu hi Chief Minister chuan a sawi a. Chief Minister chuan Mizo folk art phochhuah chu Mizoram leh hnam chawimawina a nih thu leh khualzin hip nan pawha tha tak a nih thu a sawi a ni.

Chief Minister chuan art leh hnam nihphung 'culture' chu thil inzawm tlat a nih thu sawiin hnam tin chanchin hlui hriatna hnar an 'art' a nih zel thu a sawi a. Art leh culture inzawm tlat chu UNESCO chuan thiam takin hmanruaah a hmang tih sawiin hnam hnihphung hrang hrang te humhimin hmanlai lemziak leh kawng chi hrang hranga art phochhuah te, milim ker te, lam te thlengin a humhalh tih a sawi a. UNESCO chuan hmun humhalh bik, 'world heritage site' te puangin thil hlui vawnhimna hmun hrang hrangte nasa takin a kalpui tih Chief Minister chuan sawiin World Art Day pawh kum 2019-ah UNESCO in pawmpuiin UNESCO World Art Day tia sawi a lo ni ta a ti a. Mizoten hnamdangte hriat an hlawnha langsar ber ber chu 'art' ah a nih thu sawiin Mizote lemziak, zai, lam, incheina leh hnam ze ropui tak tak te chuan Mizoram a chawimawi hle a ni a ti.

International Association of Art (IAA) - India President Pu Manaj Saha pawhin he hunah hian thu sawiin Mizorama hmun hlui tha tak tak te chuan ecotourism sector lamah theihna sang tak an neih thu a sawi a, IAA pawhin UNESCO World Heritage site-a siam tura tan a lak dawn thu a sawi a ni.

World Art Day lawmnaah hian lemziak leh art hrang hrang phochhuahna, exhibition buatsaih a ni a. A lawmna hun hi Mizoram sorkar department pali - Art & Culture, I&PR, Tourism leh Commerce & Industries department tangkawpa buatsaih a ni a. I&PR Minister Dr Vanlalhlana leh Art & Culture Minister Pu C. Lalsawivunga ten he hun hi an hmanpui bawh a ni.

<><><>

PWD MINISTER

PWD Minister Pu Vanlalhlana kawng chu mi zawng zawng intawm a nih angin a enkawl leh dimdawi kawngah mipuiten mawhphurhna an nei a ti. Vawiina Aizawl khawpui chhung kawng thawmthat zelna tur a ruahmanna leh hmachhawpte sawihona hun Coordination Meeting MINECO –a a hoa buatsaihah he thu hi PWD Minister chuan a sawi a. Minister chuan kawng tha leh tlo nei tur chuan a nihna tur ang taka kawng siam a pawimawh bakah kawngpui behchhana hna kalpui ngai thin department-ten nen thawhho a pawimawh thu a sawi a ni.

Thutkhawmah hian PHE Department, P&E Department, Aizawl DC, Superintendent of Police (Traffic), UD&PA Department, Transport Department, Aizawl

Municipal Corporation, SIPMIU, Aizawl Smart City Limited bakah Central YMA leh Aizawl City Local Council Association aiawh te an tel a. Kawng tha leh tlo nei tur a thil pawimawh hrang hrang leh harsatna awm thei sutkian dan turte sawi ho a ni.

Aizawl khawpui chhung kawng thawmthat hna hi thuang hnih a kalpui tur a ni a. Aizawl Road North Division hnuaiah km 44-a thui leh Aizawl Road South Division hnuaiah km 40-a thui thawmthat tura tih a ni a. Aizawl khawpui chhung kawngpui tam zawk hi Bituminous Concrete hmang a thawmthat tum niin Thuampui leh Selesih kawng bikah hi chuan Rigid pavement-a siam that tum a nih thu thutkhawmah hian tarlan a ni.

M/s Nidhi Creative Infrastructure Ltd.-ten EPC Mode in thla 18 chhung an thawk ang a. Bituminous Concrete atan a hman tur bungrua hi Cachar leh Rawpuichhip atanga lak tum a ni a. Zanin atang hian a thawh khatna atan Bawngkawn atanga Chanmari inkar kawng thawmthat hna thawh tan tum a ni.

<><><>

CSS PENDOWN STRIKE

Chief Secretary charge la mek tu Pu H. Lalengmawia’n Centrally Sponsored Scheme hnuaia thawk te chu dik leh mumal taka lak an awm loh avangin dah ngheh theih an nilo a ti.

Wawiin khan thuthar thehdarhtute kawmin Pu Lalengmawia chuan CSS hnathawkte chu DPC kaltlanga lak an nih loh bakah induhsakna avanga hna inpek a tam hle a ti a, lak dan mumal lo taka lak an nih avangin seniority list pawh an nei hleithei lo tih sawiin NHM leh SSA thawktu zingah an tam zual a ti a, CSS Regularisation Scheme kalpui tura thil tul leh pawimawh tak chu inter seniority niin hei hi tihfel a harsat dawn avang leh mumal lo taka thil a kal tam tawh avangin CSS Regularisation Scheme chu kalpui theih a nilo a ti a, India danpui hnuaia Article 14 leh Article 16 an bawhchhe thiango tih sawiin dan anga lak loh ten an hmang ve theilo tih a sawi.

Pu H. Lalengmawia chuan CSS hnuaia dan loa lak te dah ngheh an nih chuan an tlukpui ten court ah sawrkar a khin chuan sawrkarin thiam a chang dawnlo a ti a, mitin angkhat veka en a ngai tih sawiin AMECC thilphut ti hlawhtling tur chuan Mizoram sawrkarin India dan a bawhchhiat a ngai dawn a ti a, lungawilohna an lantir chhungin sawrkarin hlawh a cut sak dawn tih sawiin an kal thui zel chuan an service tawp palh thei ani tih a sawi bawk.

Hetihlai hian, All Mizoram CSS Employees Coordination Committee (AMCECC) chuan wawiin atang khan ni 3 chhung sorkara an thil phut nawr nan pen-down strike an huaihawt a,

AMCECC chuan thuchhuah siamin an thil phut ngiata nawrh an huaihawt mekin awmzia a neih loh chuan tun thla ni 21 atanga ni 23 chhung hian AMCECC chuan Mass Casual Leave lain nawrh chhunzawm an tum thu an sawi a ni.

AMCECC chuan Chief Secretary Charge la mektuin wawiina Press Conference-ah CSS hnuaia dan loa lakte chu dahngheh theih an nih loh thu a sawi leh, AMCECC thil phut an tih hlawhtlin chuan India Constitution bawhchhiat a ngaih dawn thu a sawi chu hriatthiam har an tih thu an sawi a. CSS te dinhmun hrechiangtu Mizoram sorkar chuan CSS te dahngheh theihna tur dan ‘Govt, of Mizoram Regularization of CSS Employees Scheme, 2024’chu duhsak taka siamsakin, he dan hi a taka an hman ngei theih nana Chief Minister pawhin a theihna dan zawng hram hram tura thuneitute a chah mawlh mawlh laiin, dahngheh an nih theihna tura hma la lova, a harsatna leh a theihloh dan zawn sak zel tu an la awm fo chu AMCECC chuan an duhloh takzet thu an sawi a ni.

AMCECC General Secretary Pu Vanlalpeka chuan CSS Regularisation Scheme nikuma passed tak chu a taka hman ngei an duh tih sawiin Mizoram puma CSS-a thawk mi sing 1 chuang te chu sawrkar kut ke ber an nih avangin a ngheta dah awm tak vek an ni a ti a, tun dinhmunah MR an bill theihloh bakah pay scale mumal neilo in pension pawh awmlo in an thawk a, CSS Regularisation Scheme chu DP&AR thuchhuahin a hnawl avangin hreh tak chungin lungawiloh an kalpui a ngai a ti a, Mizoram sawrkar chuan lungawi lohna lantir an tumah hnathawk lote chu CCS (Conduct) Rules, 1964 hmanga an hlawh cut a ni dawn tih chu sawi mahse nawrh an kaltlang pui tih a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

VC ASSN ELECTS

All Mizoram Village Council Association 2025-2030 hruaitu thlanna vawiina Aizawl Vanapa Hall-a neihah Elected OB post awm zawng zawngah ZPM Party atanga Village Council member-te thlantlin an ni a,

Hruaitu thlanthar te hi, President : Pu FP Laikhama VCP, Sihphir Venghlun, Sr. Vice President : Pu H.Lalfakzuala VCP, Kawnpui VC-III leh Treasurer : Pu C.Lalromawia, VCP Tualpui khua te an ni.

AMVCA hruaitu term hi kum 5 a ni a, vawiina Village Council hruaitu thlan thar te hi an lawmpui thu ZPM party thuchhuah chuan a sawi a, VC Memberte chu ram hmasawna hnathawh kawngah Sorkar kut ke pawimawh tak an nih avangin Association hruaitu tha neih a tul hle a, kawng hrang hranga Sorkar hmalakna thawhpui thei tur Association hruaitu an nei ta chu ZPM Party chuan thlamuan thlak an ti a, khaw tin leh veng tinah hmasawna thar duhawm tak tak hmuh ngei an beisei tih an tarlang a ni.

Vawiin AMVCA hruaitu thlan hi President tanglai Pu K.Lalngaizuala(VCM), East Lungdar in a kaihruaia, VC member mi 220 kalkhawmin, Returning Officer(RO) Pu R.Lalhmingmawia General Secretary AMVCA kaihruaina hnuaiah inthlanna hi tluang taka neih a ni a, Hruaitu hlui leh hruaitutu tharte hian Charge an inhlan nghal bawk a ni.

<><><>

STUDENT PROTEST

Govt. Zirtiri Residential Science College zirlaite chu an zirtirtu Pi Lalthanpuui Hnamte sawn tur duhloin an college luhkaah an vawiin khan an pungkhawm a.

College zirlai hruaituten Akashvani an hrilh danin an zirtirtu Botany department-a Asst. Professor Pi Lalthanpuui Hnamte chu Serchhip college a thawk mek Dr. Lalmangaihzuai nen sorkarin thlak thleng a tum a. Pi Lalthanpuui Hnamte chu an college tana tangkai tak ni mek, zirtir hna mai bakah college thil pawimawh hrang hrang tangkai leh nihna pawh chelh hnem tak, club hrang hrang hruaitu ni mek a nih avangin sawn chhuah an duh lo a ni.

Hetihlai hian, Serchhip College Zirlai pawl Students Union te chuan Serchhip Press Club ah Serchhip a thuthar thehdarhtute kawmin an college a Lecturer mamawh te, Chief Minister leh Higher & Tech Education Minister hnena vawi engemaw zat Sorkar a an lo thlen tawh chu vawiin thlenga tih hlawhtlin a la nih loh avangin naktuk zing dar 8:30 atangin tiamchin awm lovin college chhunga vantlang kawng, DC leh a hnuaia Officer zawng zawng te chenna Khawtetlang panna Kawng dan an tum tih an sawi a ni.

SU Vice President Benjamin Lalmangaihkhima chuan lecturer an mamawhna hi nikum lam atangin thuneitu sangah an thlen tawh a, kumin februar thla khan Chief Minister in Serchhip district Hospital a Ultrasound thar a hawn naa a thu sawi ah College ah hian Zirtirtu Geography department-ah a nghet pahnih, Zoology department-ah a nghet pakhat leh nghet lo pakhat, leh BCA department-ah a nghet lo pakhat pek belh a tiam chu vawiin thlenga, Higher & Tech Education Deptt in a la tihhlawhtlin loh thu leh, kum 6 chhungin zirtirtu nghet 13 zet sawn chhuah an nih thu te, an aiah nghet lo dah thin an nih thu te a sawi a. An dinhmun ngaihtuah in leh NAAC assesment an hmachhawn tur ah Grade-A an hauh phak tawh loh phah an hlauhthawn thu te a sawi a ni.

SU hrulaitute sawi danin, tun dinhmun ah GSC ah hian zirtirtu nghet lo 31lai an lain, a nghet chu 21 chauh an ni a, Focus district a la puan ve loh District zingah Serchhip District chhunga Serchhip College chauh hi Multidisciplinary College (Arts, Science leh BCA awm vek na college) awmchhun n ni a, infrastructure a pachhe ber an ni.

<><><>

ED

Enforcemnet Directorate (ED) chuan vawiin khan Congress senior leader Priyanka Gandhi Vadra-i pasal Robert Vadra chu sum chehrelh thubuaiah thu an zawtfiah. Pu Vadra company-in Gurugram-a ram lei chungchangah thil dik lo awm nia an hriat avangin ED hian thu an zawtfiah a. Tukin khan Pu Vadra hi New Delhi-a ED Office ah thu zawhfiah a ni.

Vawiin vek khan ED te chuan Rajasthan Minister hlui Pratab Singh Khachariyawas leh midang engemawzat te chenna hmun 15 ami an dap a. M/s PACL ten sum peipunna lama cheng vaibelchhe sing li leh sang 8 tih chingpen thubuai kaihhnawihah heng hmunte hi ED chuan an dap nia thudawn a ni a..

<><><>

CYBER

Central Bureau of Investigation (CBI) chuan Digital Arrest thubuaiah mi pali an man. CBI te hian state pali Maharastra, Uttar Pradesh, West Bengal leh Rajasthan-a hmun 12 dapin heng mi bum hmangte hi an man a. CBI thuchhuah danin Rajasthan-a Jhunjhunu-a Cyber Police Station ah thubuai ziahluh a ni a. He thubuaia tarlan anih danin internet hmanga inbumna tuartu hian thla thum chuang sawrkar dan leh thupek kengkawhtu anga insawi hnen atangin vau a tawk a. Hemi hun chhung hian tum 42 pawisa chhuh tuma vau niin cheng vaibelchhe 7 leh nuai 67 chuang a chan a ni. CBI te chuan pawikhawihtua puhte lak atang hian bank account bu, debit card, chequebook leh khawl thil chi hrang hrang an man a ni.

<><><>

RAINFALL

India Meteorological Department (IMD) chuan kumin furah ruahtui a tam dawn tih a sawi. IMD Director General, Dr.Mrutyunjay Mohapatra chuan vawiin khan New Delhi-ah chanchinbumite kawmin kumin June atanga September thla furpui chhungin ruahtui tla zat chu a pangngai aia tam a ni dawn tih a sawi a. Hmarchhak, hmarthlang leh chhimlam hmun thenkhat tihlohah chuan hmun tam zawkah chuan ruahtui hi kumdang aiin a tam dawn tih a sawi a. Kumin fur chhungin El Nino dinhmun pawh a a kal ngaiin a kal chhunzawm ang ati bawk.

<><><>